

## **Nowinske wozjewjenje**

**Budyšin 17. januara 2021**

Serbscy čłonojo knježerstwowych stronow w žiwej rozmołwje:

### **Wuwjedženje koaliciskeho zrěčenja na pruwowanišću**

Serbske předewzaća w koaliciskim zrěčenju sakskeho knježerstwa měli so nětko dale a doslědnje zwoprawdźić. Na to so dojednachu wjacori serbscy čłonojo koaliciskich stronow CDU, Zwjazka 90/Zelenych a SPD minjeny štwórtk wječor 14. januara 2021 na widejowej konferency.

Na wuradźowanje wo sakskim knježerstwowym programje za lěta 2019 do 2024 přeprosyste krajne dźěłowe zjednoćenstwo Zelenych „Serbske žiwjenje” a krajne koło socialdemokratow „Serbja”. Serbskaj čłonaj křescanskich demokratow so wuradźowanju runje tak přidružištaj kaž čłonce Sakskeho krajneho sejma Franziska Schubert a Sabine Friedel, fachowej rěčnicy w serbskich naležnosćach w frakcijomaj Zelenych a SPD.

Franziska Schubert informowaše wobdźělnikow na spočatku zetkanja wo zakótwjenju serbskich wočakowanjow w tuchwilnych etatowych jednanjach w Drježdźanach. Při tym wona na zwyżenje přiražkow za Założbu za serbski lud skedźbni. Powěsć wo kiwacym zesylnjenju pjenježneje bazy wobdźělnicy chwalo registrowachu.

Politikarka Zelenych rozprawješe dale wo zdžěla zwyżenych přiražkach za předewzaće 2plus a za dalše kubłanskopolitiske naležnosće w serbskim wobłuku. Tohorunja z wjeselom rozmołwne koło na wědomje bjerješe, zo so z wotzamknjenjom statneho zrěčenja za MDR Serbam skónčnje zaruči krute městno w jeho rozhlósowej radže. Z tym so dvě jadriwej předewzaći sakskeje koalicije zwopradžitej.

Wuznaće w koalicyckim zřěćenju k wjace prawam soburěčenja, sobutworjenja a samopostajenja serbskeho ludu serbscy čtonojo třoch demokratiskich stronow tohorunja wobšěrnje rozjimachu. Woni namjetuja a proša, zo by Rada za serbske naležnosće w tutym zwisku trěbny nutřkoserbski dialog moderěrowała, tež rozmołwu mjez Serbskim sejmom a Domowinu. Při tym by spomožne było, sej wuspěšne procesy wuwědomić, kotrež w zašłosći dialog mjez Serbami postajowachu, na přikład jednanja mjez cyrkwu a Domowina lěta 1988, kulojte blida w dobje měrliweje rewolucije abo wuradźowanja wuhloweje komisije. Akteroj so dojednachu na „dialog z wuslědkom“. Zdobom woni statne knježerstwo namołwjeja, zo by wone tónle proces doraznišo hač dotal podpěrało.

Sakske knježerstwo měło tež wosebite zajimy serbskeho ludu při strukturnych změnach we Łužicy zawěsćić – a to z wobdźělenjom jeho zastupjerjow w rozsudnych gremijach.

We wobłuku kubłanja běchu sej wobdźělnicy wuradźowanja přezjedni, zo dyrbi so ewaluacija 2plus tež na zažnodźěšćowske WITAJ-projekty rozšěrić. Zdobom ma so stajne přepruwowanje kwality tutych poskitkow z dalokosahacymi dalekubłanskimi móžnosćemi za wučerjow a kubłarjow zwjazać. K zaručenju pedagogiskeho dorosta měli nuznje nowe wabjenske a wukubłanske kampanje startować.

Po měnjenju wobdźělnikow konferency by w koalicyckim zřěćenju tematizowane připóznaće serbskeje řeče w šulskich wotzamknjenjach jako druha cuza řeč image serbsčiny pozběhnyło, přistup k njej wolóžilo a z tym ličbu jeje řečacych přisporiło. Wobdźělnicy wuradźowanja rozprawjachu wo pozitiwnych nazhonjenjach z mnohimi řečemi we wjacorych zwjazkowych krajach. Wobstejace wobmyslenja někotrych serbskich wučerjow dyrbjeli so zhromadnje diskutować. Tež při tym by měla Rada za serbske naležnosće w Sakskej bjez komdženja moderaciju přewzać.

Zhromadźizna zaběraše so tež z mostowej funkciju serbskeho ludu k wuchodnym susodnym krajam, kotruž tohorunja koalicycke zřěćenje

tematizuje. Tale funkcija móhła so předewšěm z nuznje trěbnej modernizaciju a digitalizaciju serbskich mediijow a sylnišej prezencu serbskich wobsahow zwjazać, kaž to wobnowjene rozhlósowe statne zrěčenje MDR wuzběhuje, tohorunja w rozhlósowym poskitku z a do Čěskeje, Pólskeje a Němskeje. Z tym bychu so serbske a mnohorěčne rumy wosebje za dźěći a młodostnych wutwarić hodźeli.

Wobdźělnicy konferency hódnoćichu zhromadnu wuměnu jako spomožnu za dalši diskurs wo serbskich temach na wšěch runinach politiki a dojednachu so na prawidlowne pokročowanje tohole rozmołwneho formata.

Robert Krawc, rěčnik krajneho dźěłoweho zjednoćenstwa Zelenych „Serbske žiwjenje”  
Měrćin Krawc/Benedikt Dyrlich, 1. a 2. rěčnik krajneho dźěłoweho koła SPD „Serbja”